

## ARLeF: l'imni dal Friûl al so esordi uficiâl

*Sabide ai 6 di Otubar, intal Domo di Lignan, cu la Mitteleuropa Orchestra e il Coro del Friuli Venezia Giulia*

Al sarà presentât sabide ai 6 di Otubar, l'imni uficiâl dal Friûl: *Incuintri al doman*. Dopo cualchi mê di lavôr intens, la prime esecuzion e vignarà fate intal Domo di Lignan, aes 9 di sere, in ocasion dal concerti de Mitteleuropa Orchestra. Prime di cheste opere, in maniere significative, e vignarà eseguide la Novesime sinfonie di Beethoven, che e conten l'Imni ae gjonde, che al è l'Imni de Europe Unide. La esecuzion vocâl e sarà dal Coro del Friuli Venezia Giulia, diret dal mestri Cristiano dell'Oste.

Chest al sarà l'at conclusif di un projet promovût dal Istitût Ladin Furlan "Pre Checo Placerean" e dal Messaggero Veneto, in colaborazion cu la ARLeF. Il toc vincidôr dal concurs al jere stât anunziât in ocasion de Fieste di Patrie dal Friûl, che si è tignude a Voleson Darzin intal Avrîl stât.

«O vevi tal cjâf cheste melodie za di un pâr di agns – al à contât il compositôr, Valter Sivilotti, autôr des musichis -. Mi pareve significative pal nestri teritori e une vore "intonade" cun lui. Mi soi confrontât cul leterât Renato Stroili Gurisatti che al à condividût la mê prime impression. Cussì, tal moment dal Concors organizât de ARLeF, o ai presentât la composizion che e je plasude ancje ae jurie. Un imni al à la sô metriche e mi pâr di vê lavorât suntun teme nobil, cuntun andament mitteleuropean che al caraterize, di tancj decenis, cheste nestre regjon».

Il toc che, pe part testuâl, al è stât scrit di Renato Stroili Gurisatti, al è stât selezionât di une jurie di esperts tant che il miôr fra i 10 presentâts, marcant che "la musiche e il test si integrin a vicende, midiant di une scriture vocâl e strumentâl di grant respîr e di slanç di cjant potent".

Intai dîs che a vegnin a saran disponibii par ducj i spartîts in 12 declinazions (orchestre, bande, corâls...), di podê doprâ intes occasions uficiâls li che lis comunitâts furlanofonis a son cjapadis dentri e si podarà scoltâ l'audio de esecuzion sul sît [www.arlef.it](http://www.arlef.it).

*Udin, ai 4 di Otubar dal 2018*

### INFORMAZIONS PE STAMPE - INFORMAZIONI PER LA STAMPA

**Ufficio Stampa ARLeF** CALT relazioni pubbliche Tel. + 39 0432 229127 / **e-mail: [arlef@caltpr.it](mailto:arlef@caltpr.it)**  
Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<<